

Službene novine Federacije BiH, broj 40/16

Na osnovu člana 25. stav 2. Zakona o agencijama i unutrašnjim službama za zaštitu ljudi i imovine ("Službene novine Federacije BiH", br. 78/08 i 67/13), federalni ministar unutrašnjih poslova donosi

PRAVILNIK

O NAČINU ORGANIZIRANJA PERIODIČNE PROVJERE SPOSOBNOSTI RUKOVANJA ORUŽJEM, PROVJERE ZDRAVSTVENE I PSIHOFIZIČKE SPOSOBNOSTI I STRUČNE OBUKE ZAPOSLENIKA AGENCIJA ZA ZAŠTITU LJUDI I IMOVINE

POGLAVLJE I. OSNOVNE ODREDBE

Član 1. **(Predmet Pravilnika)**

Ovim pravilnikom utvrđuje se način organiziranja periodične provjere sposobnosti rukovanja vatrenim oružjem (u daljnjem tekstu: oružje) za lica koja obavljaju poslove fizičke zaštite i provjere zdravstvene i psihofizičke sposobnosti svih lica koja obavljaju poslove fizičke ili tehničke zaštite te stručne obuke za lica koja obavljaju poslove fizičke i tehničke zaštite u agenciji prema Zakonu o agencijama i unutrašnjim službama za zaštitu ljudi i imovine ("Službene novine Federacije BiH", br. 78/08 i 67/13 - u daljnjem tekstu: Zakon).

Član 2. **(Redovno i kontinuirano provođenje periodične provjere sposobnosti rukovanja oružjem, zdravstvene i psihofizičke sposobnosti te stručne obuke zaposlenika agencije)**

(1) Agencija za zaštitu ljudi i imovine (u daljnjem tekstu: agencija) dužna je redovno i kontinuirano organizirati i provoditi periodičnu provjeru sposobnosti rukovanja oružjem (u daljnjem tekstu: rukovanje oružjem), provjere zdravstvene i psihofizičke sposobnosti, kao i stručnu obuku (usavršavanje) za lica koja obavljaju poslove fizičke i tehničke zaštite (u daljnjem tekstu: stručna obuka).

(2) Pod pojmom zaposlenici, prema ovom pravilniku, smatraju se lica koja su u radnom odnosu u agenciji i koja su angažirana na poslovima fizičke ili tehničke zaštite, odnosno koja imaju certifikat za obavljanje tih poslova, koji se izdaje u skladu sa propisom koji se donosi na osnovu člana 19. stav 2. Zakona.

(3) Provjera i stručna obuka iz stava (1) ovog člana vrši se svake druge godine.

Član 3.
(Primjena ovog pravilnika i na zaštitarske službe)

U skladu s odredbom člana 45. Zakona, odredbe ovog pravilnika primjenjuju se i na pravna lica koja imaju organiziranu vlastitu unutrašnju zaštitarsku službu (u daljnjem tekstu: služba zaštite) za zaposlena lica koja su angažirana na obavljanju poslova fizičke i tehničke zaštite ljudi i imovine.

POGLAVLJE II. PROVJERA RUKOVANJA ORUŽJEM

Član 4.
(Svrha provjere rukovanja oružjem)

(1) Svrha provjere rukovanja oružjem je da se zaposlenici agencije koji su angažirani na poslovima fizičke zaštite obuče za sigurno i pravilno rukovanje oružjem s ciljem da poslove zaštite ljudi i imovine s odgovarajućim naoružanjem izvršavaju na siguran i profesionalan način.

(2) Agencija je dužna da osigura da svi zaposlenici agencije koji rade na poslovima fizičke zaštite budu obučeni za rukovanje oružjem, na način propisan ovim pravilnikom, što se postiže osiguranjem materijalnih, finansijskih, tehničkih, kadrovskih i drugih potreba za provođenje provjere.

Član 5.
(Način provođenja provjere rukovanja oružjem)

(1) Provjera rukovanja oružjem izvodi se po programu provjere rukovanja oružjem koji izrađuje agencija u skladu sa međunarodnim standardima koji se odnose na pitanja iz te oblasti.

(2) Program iz stava (1) ovog člana dostavlja se Policijskoj akademiji Federalnog ministarstva unutrašnjih poslova - Federalnog ministarstva unutarnjih poslova (u daljnjem tekstu: Federalno ministarstvo) radi davanja saglasnosti, koja se izdaje kada se utvrdi da je program izrađen u skladu s ovim pravilnikom.

(3) Agencija je dužna da postupa prema uputama Policijske akademije Federalnog ministarstva koje se odnose na izradu programa iz stava (1) ovog člana, kako bi se dala saglasnost iz stava (2) ovog člana.

(4) Upute iz stava (3) ovog člana daju se pismeno.

Član 6.
(Sadržaj programa provjere rukovanja oružjem)

Program provjere rukovanja oružjem iz člana 5. ovog pravilnika sadrži sljedeće:

a) naziv agencije i ime odgovornog lica;

- b) broj i datum odobrenja za držanje vatrenog oružja;
- c) broj zaposlenih lica agencije koja podliježu provjeri rukovanja oružjem;
- d) pitanja za teoretsku provjeru i pitanja za praktično gađanje;
- e) mjesto, period i način vršenja provjere rukovanja oružjem;
- f) mjere sigurnosti koje se moraju preduzeti tokom vršenja praktičnog gađanja;
- g) vrsta vatrenog oružja za koje se vrši provjera rukovanja oružjem;
- h) ime i prezime instruktora koji će pratiti provjeru rukovanja oružjem.

Član 7.
(Sadržaj provjere rukovanja oružjem)

- (1) Provjera rukovanja oružjem sastoji se od teoretske provjere znanja i izvođenja gađanja.
- (2) Teoretska provjera znanja obuhvata upoznavanje sa načinom držanja, nošenja, rukovanja i pravilne upotrebe vatrenog oružja.
- (3) Praktični dio obuhvata izvođenje gađanja vatrenim oružjem kratke ili duge cijevi.
- (4) Izvođenje gađanja vatrenim oružjem kratke cijevi sastoji se od ispaljenih najmanje 10 metaka i pet metaka iz vatrenog oružja dugačke cijevi ukoliko agencija u svome radu koristi to oružje.
- (5) U toku izvođenja gađanja agencija, odnosno služba zaštite može da koristi vatreno oružje koje se nalazi u njihovom vlasništvu ili u vlasništvu drugog lica koje organizira poslove izvođenja gađanja za agenciju, odnosno službu zaštite.

Član 8.
(Mjesta za provođenje provjere rukovanja oružjem)

Agencija provjeru rukovanja oružjem može obavljati samo na mjestima i objektima u kojima je predviđeno da se vrši obuka gađanja vatrenim oružjem, što u programu iz člana 5. ovog pravilnika mora biti označeno (navedeno).

Član 9.
(Način izvođenja provjere rukovanja oružjem)

- (1) Provjera rukovanja oružjem izvodi se uz obavezan nadzor stručnih lica za rukovanje oružjem (u daljnjem tekstu: instruktor).
- (2) Instruktor iz stava (1) ovog člana je lice koje ima certifikat za rukovanje vatrenim oružjem i izvođenje bojevog gađanja.

(3) Nakon izvršene provjere rukovanja oružjem prema programu iz člana 5. ovog pravilnika, instruktor je dužan u roku od tri dana sačiniti zapisnik, koji ovjerava odgovorno lice agencije.

(4) Zapisnik iz stava (3) ovog člana sadrži imena koja su prošla provjeru rukovanja oružjem, lične podatke o instruktoru i datum i mjesto provođenja provjere rukovanja oružjem i podaci o oružju i podaci o vlasništvu oružja.

(5) Primjerak zapisnika iz stava (3) ovog člana dostavlja se Federalnom ministarstvu i kantonalnom ministarstvu unutrašnjih poslova u roku od tri dana od dana sastavljanja zapisnika.

POGLAVLJE III. PROVJERA ZDRAVSTVENE I PSIHOFIZIČKE SPOSOBNOSTI

Član 10.

(Obaveza organiziranja provjere zdravstvene i psihofizičke sposobnosti)

(1) Agencija je dužna da organizira provjeru zdravstvene i psihofizičke sposobnosti za sve zaposlenike koji obavljaju poslove fizičke i tehničke zaštite.

(2) Provjera iz stava (1) ovog člana odnosi se na provjeru zdravstvene i psihofizičke sposobnosti.

Član 11.

(Nadležni organ koji vrši provjeru zdravstvene i psihofizičke sposobnosti)

Provjeru zdravstvene i psihofizičke sposobnosti vrši nadležna zdravstvena ustanova u skladu sa propisom koji se donosi na osnovu člana 16. stav (5) Zakona.

Član 12.

(Način provjere fizičke sposobnosti)

(1) Fizičku sposobnost vrši komisija, koju imenuje agencija.

(2) Komisija iz stava (1) ovog člana sastoji se od tri člana, od kojih je najmanje jedan član komisije stručno lice s najmanje završenim prvim ciklusom visokog obrazovanja, 180 ECTS bodova ili VI stepenom školske spreme s diplomom iz oblasti sporta i tjelesnog odgoja.

(3) O vremenu provođenja provjere fizičke sposobnosti agencija je dužna obavijestiti Federalno ministarstvo i kantonalno ministarstvo unutrašnjih poslova radi praćenja pravilnog provođenja provjere fizičke sposobnosti zaposlenika.

(4) Izuzetno, invalidna lica koja obavljaju poslove tehničke zaštite u skladu sa članom 25. Zakona nisu dužna da prođu provjeru fizičke sposobnosti utvrđene u čl. 13. i 14. ovog pravilnika.

Član 13.

(Sadržaj provjere fizičke sposobnosti)

(1) Provjera fizičke sposobnosti sastoji se iz provjere sljedećih fizičkih disciplina i to:

- a) sklekovi;
- b) trbušnjaci;
- c) skok udalj iz mjesta;
- d) kuper test;
- e) sprint.

(2) Provjera fizičkih disciplina iz stava (1) ovog člana sastoji se:

- za tač. a) i b) - od broja izvedenih sklekova i trbušnjaka u jednoj minuti;
- za tačku c) - od izmjerene dužine skokova;
- za tačku d) - od pretrčanih metara za 12 minuta;
- za tačku e) - od izmjerenog vremena za pretrčanih 100 metara.

(3) Zaposlenik je s uspjehom zadovoljio provjeru fizičke sposobnosti ako je osvojio minimalno 18 bodova.

(4) Zaposleniku koji nije ostvario minimalni broj bodova iz stava (3) ovog člana agencija je dužna u roku od 60 dana od dana završene provjere osigurati ponovnu provjeru fizičke sposobnosti.

(5) Ako zaposlenik i na ponovnoj provjeri fizičke sposobnosti iz stava (4) ovog člana ne ostvari minimalni broj bodova iz stava (3) ovog člana, agencija je dužna tom zaposleniku osigurati ponovnu provjeru i u narednoj kalendarskoj godini.

(6) Ukoliko zaposlenik ne ostvari minimalan broj bodova iz stava (3) ovog člana i nakon provjere iz stava (5) ovog člana, agencija je dužna tog zaposlenika uputiti na provjeru zdravstvene i psihofizičke sposobnosti iz člana 11. ovoga pravilnika.

Član 14.

(Kriteriji za provjeru fizičke sposobnosti prema spolnoj i starosnoj strukturi)

(1) Provjera fizičke sposobnosti iz člana 13. ovog pravilnika vrši se prema tabeli sa propisanim kriterijima za provjeru fizičke sposobnosti, koja se nalazi u prilogu ovog pravilnika i njegov je sastavni dio.

(2) Kriteriji za provjeru fizičke sposobnosti su izrađeni prema spolnoj i starosnoj strukturi zaposlenika.

POGLAVLJE IV. STRUČNA OBUKA

Član 15.

(Obaveza organiziranja stručne obuke zaposlenika)

(1) Agencija je dužna da organizira redovnu i kontinuiranu stručnu obuku zaposlenika koji obavljaju poslove fizičke i tehničke zaštite u roku utvrđenom u članu 2. stav (3) ovog pravilnika.

(2) Svaki zaposlenik agencije je dužan da prođe stručnu obuku na način utvrđen ovim pravilnikom, o čemu agencija vodi evidenciju.

(3) Stručna obuka iz stava (1) ovog člana vrši se po planu i programu stručne obuke koji donosi agencija prema članu 16. ovog pravilnika, a za koji saglasnost daje Policijska akademija Federalnog ministarstva ili prema planu i programu Policijske akademije ukoliko se agencije odluče da stručnu obuku organiziraju u okviru Policijske akademije Federalnog ministarstva.

Član 16.

(Sadržaj stručne obuke)

(1) Plan i program stručne obuke obuhvata stručno osposobljavanje i usavršavanje zaposlenika agencije o praktičnoj primjeni propisa i vještina iz oblasti zaštite ljudi i imovine, a odnosi se na sljedeća pitanja i to:

a) pitanja o načinu i postupku provođenja fizičke zaštite (primjena borilačkih vještina, rukovanja vatrenim oružjem, prava i obaveze zaposlenika u toku obavljanja poslova fizičke zaštite - primjena ovlaštenja, nošenja iskaznice, pitanja iz radnog odnosa, poslovi intervencije i dr.);

b) pitanja o načinu provođenja tehničke zaštite (način i postupak obavljanja poslova tehničke zaštite - vrsta tehničkih sredstava koja se koriste za tehničku zaštitu, izrada elaborata tehničke zaštite i dr.);

c) upoznavanje o primjeni borilačkih i drugih vještina koje su neophodne da se koriste prilikom obavljanja poslova fizičke zaštite, radi zaštite života i tijela lica koja štite i svog života te imovine koju štiti;

d) i druga pitanja koja se odnose na zaštitu ljudi i imovine.

(2) Ukoliko se agencije odluče na provođenje stručne obuke u okviru Policijske akademije, stručna obuka se organizira i vrši prema Planu i programu stručne obuke za lica koja obavljaju poslove fizičke i tehničke zaštite, koji se nalazi u prilogu ovog pravilnika i koji se u zavisnosti od potreba agencije modificira/prilagođava zahtjevima agencija o pitanjima za teoretsku i praktičnu provjeru i drugim pitanjima koja se odnose na zaštitu ljudi i imovine.

(3) Plan i program koji donosi agencija iz stava (1) ovog člana sadrži sljedeće:

a) naziv agencije i ime odgovornog lica;

- b) broj zaposlenih lica agencije koja podliježu stručnoj obuci;
 - c) pitanja za teoretsku i praktičnu provjeru ili druga pitanja koja se odnose na zaštitu ljudi i imovine;
 - d) mjesto, period i način vršenja stručne obuke (samostalno ili putem Policijske akademije Federalnog ministarstva);
 - e) ukoliko se stručna obuka organizira samostalno, imena stručnih lica određenih za vršenje obuke prema pitanjima iz tačke c).
- (4) Stručna obuka iz stava (1) ovog člana organizira se i izvodi u vidu teoretske i praktične obuke.
- (5) Stručna obuka se izvodi putem seminara, kurseva, radionica i drugih vidova stručnog usavršavanja i osposobljavanja.

Član 17. (Organi koji su ovlašteni za organiziranje stručne obuke)

(1) Stručnu obuku prema planu i programu iz člana 15. stav (3) ovog pravilnika organizira agencija samostalno ili u okviru Policijske akademije Federalnog ministarstva putem Radne grupe za provođenje stručne obuke za lica koja obavljaju poslove fizičke i tehničke zaštite, koju formira federalni ministar unutrašnjih poslova.

POGLAVLJE V. EVIDENCIJA I NADZOR NAD PROVOĐENJEM PRAVILNIKA

Član 18. (Vrste i sadržaj evidencija koje vode agencije prema ovom pravilniku)

(1) Prema članu 48. stav 3. tač. 8) i 10) Zakona agencije su dužne da vode evidenciju o održanoj provjeri gađanja iz vatrenog oružja i evidenciju o redovnim ljekarskim pregledima čuvara, što se vrši na način utvrđen u propisu koji se donosi na osnovu člana 49. Zakona.

(2) Pored evidencije iz stava (1) ovog člana agencija je dužna da vodi i evidenciju o provjeri fizičke sposobnosti i evidenciju o stručnoj obuci zaposlenika koji obavljaju fizičku i tehničku zaštitu.

(3) Evidencije iz stava (2) ovog člana vode se u obliku knjige formata A4.

Član 19. (Sadržaj evidencije)

(1) Evidencije iz člana 18. stava (2) ovog pravilnika sadrže sljedeće podatke:

a) Evidencija o provjeri fizičke sposobnosti:

- imena i prezimena lica koja su obavila provjeru fizičke sposobnosti;
- mjesto i datum izvršene provjere;
- ime i prezime stručnih lica koja su vršila provjeru fizičke sposobnosti;
- rezultati provjere fizičke sposobnosti;
- napomena.

b) Evidencija o licima koja su pohađala stručnu obuku:

- ime i prezime zaposlenih lica koja su obavila stručnu obuku;
- mjesto i datum obavljanja stručne obuke;
- podaci o stručnom licu koje je obavilo stručnu obuku ili napomenu da je stručna obuka organizirana putem Policijske akademije Federalnog ministarstva;
- teme stručne obuke (za borilačke vještine - vrste borilačkih vještina koje su bile predmet stručne obuke);
- napomena.

Član 20.
(Organ koji je nadležan za provođenje ovog pravilnika)

Upravni nadzor nad provođenjem ovog pravilnika vrši Federalno ministarstvo unutrašnjih poslova - Federalno ministarstvo unutarnjih poslova putem davanja stručnih mišljenja, traženja izvještaja, informacija i dr.

POGLAVLJE VI. PRELAZNE I ZAVRŠNE ODREDBE

Član 21.
(Prestanak važenja Pravilnika)

Danom stupanja na snagu ovog pravilnika prestaje da važi Pravilnik o načinu organiziranja periodične provjere sposobnosti rukovanja oružjem, provjere zdravstvene i psihofizičke sposobnosti i stručne obuke zaposlenika agencija za zaštitu ljudi i imovine ("Službene novine Federacije BiH", br. 92/14 i 60/15).

Član 22.
(Stupanje na snagu Pravilnika)

Ovaj pravilnik stupa na snagu osmog dana od dana objavljivanja u "Službenim novinama Federacije BiH".

Broj 01-243
18. maja 2016. godine
Sarajevo

Ministar
Aljoša Čampara, s. r.